

Awe sentencia ta cay den caso Parke di molina Urirama

ORANJESTAD – Dia 14 di Februari 2013, Corte den Prome Instancia a trata e caso sumario cu Junior Croes y 6 otro persona a cuminsa contra WEB N.V., Vaderpiet, Uri-

rama y Gobierno. Ta un cantidad di abogadoan tabata presente den Corte pa representa companianan y tambe e habitantenan na Urirama. Mr. Malmberg y mr. de Bie a

representa e grupo di habitantenan den vecindario di Urirama, abogadoan mr. Brown y mr. Martis a representa WEB, mr. Sjiem Fat y mr. Carlo a representa Gobierno. Mr. Peterson y mr. Kloes a representa Vaderpiet, Urirama y otro companianan.

Mr. Malmberg y mr. de Bie a muestra cu Gobierno ta actua inhuisto pa cu e habitantenan di Urirama ya cu a laga haci trabounan sin cu tin e permisionan necesario pa cu esaki. Ademas nan ta haya cu e molinanan di biento lo afecta salud di e habitantenan. Ta trata aki di 3 mil hende cu ta biba den vecindario y no por laga nan interes un banda. E abogadoan ta haya cu Gobierno mester ta mucho mas cuidadoso cu e investigacionnan. Cada conseho cu no ta bon ta wordo poni un banda

y ta parce cu Gobierno no ta haci oido. Abogado mr. Sjiem Fat y mr. Carlo a muestra cu e habitantenan di Urirama ta bisa cu nan salud ta wordo afecta, e balor di nan propiedad ta baha. Tur esaki no ta cuadra cu realidad. Rapport MER ta muestra bon cla cu no mester teme esaki. Segun e abogadoan, no tin trabou y lo no tin trabounan lo tuma luga tanten cu e permisionan correspondiente keda duna. Na opinion di e abogadoan, e habitantenan a faya di cuminsa un caso LAR contra e decision di Gobierno for di un comienso y p'esey nan protesta no tin validez. Ta "game over" pa e habitantenan. Abogado mr. Peterson y mr. Kloes no ta haya cu habitantenan tin motibo di urgencia. A wordo muestra cu Windtpark a papia cu esnan

concerni pa conservacion di medio ambiente. A laga traha rapport MER y segun investigacion no tin ningun consecuencia pa cu e habitantenan, flora, fauna y bestianan. Nan ta haya cu e habitantenan no a coy e procedura corecto pasobra ainda no tin decision pa otorga permisionan. Nan a muestra tambe cu no ta asina cu e turbinanan di biento ta hopi cerca di e casnan. E turbina di biento mas cerca di e casnan ta mas cu 900 meter leu. Abogado mr. Brown di WEB N.V. ta haya cu e habitantenan di Urirama ta kere cosnan cu no ta realidad. WEB y Windtpark tin solamente un acuerdo di intencion firma pa mira si e proyecto lo por ta realisabel. Awe mainta Hues ta dicta sentencia y BON DIA ARUBA lo informa lectornan riba e decision. □



Momento dia cu e abogadoan y respectivo partidonan a bandona sala di Corte despues di e caso di Urirama a tuma luga luna pasa.

